

2-8-5
5
卷首序文例目山圖

卷一本迹門

卷二形勝門

卷三靈異門

卷四檀施門

卷五梵剎門

普陀洛迦新志

第一冊 德厚題卷

普陀洛迦新志卷首

序一

釋迦入滅。以金縷袈裟。付摩訶迦葉波。迦葉奉衣。住雞足山。以待慈氏。據奘師所記。屈屈吒播陀。此言雞足。亦名窠盧播陀。此言尊足。在摩竭陀國。莫訶河東百餘里。道里明白如此。乃今雲南賓川之境。有雞足山。亦以爲卽迦葉傳衣示寂之處。著之山志。華嚴末會。鞞瑟胝羅居士告善財言。南方有山。名補怛洛迦。有菩薩名觀自在。奘師所記。爲布咀洛迦。在南印度。秣羅矩吒國之南。秣刺邪山之東。道里明白如此。乃今定海縣東海中有普陀山。亦以爲卽補怛洛迦。觀自在菩薩說法之處。著之山志。然則記可據乎。志可據乎。曰。是有說。地志者流。出於山經。禹與伯益。主名山川。量其道里。遊方之內。此其職也。至於華嚴法界。毘盧法身。超情離見。不在此類。卽人卽法。卽依卽正。毘盧之法身也。自他無礙。一異無礙。華嚴之法界也。卽人卽法。法之所在。佛之所在也。卽依卽正。佛之所在。土之所在也。法外無佛。佛外無土。觀自在外無此。

山。此山之外無東土。無南印度。可也。自他無礙。則此山之在東方。與此山之在西方。無礙也。一異無礙。則西方有此山。東方有此山。乃至餘方亦有此山。亦無礙也。非他非自。非一非異。則此方之山。非補怛洛迦。非在西方。乃至非在餘方。亦無礙也。事事無礙。法界性也。普賢偈曰。如於此處見佛座。一切塵中悉如是。佛身無去亦無來。所有國土皆明現。然則古記之文。與今志之說。爲同爲異。孰爲可據。又不足論也。抑余之感於茲志。雞足僻在徼外。普陀介在海中。開山皆晚。而普陀當海通之後。市舶上下。在昔蓮池望洋而歎者。乃今凡夫褰裳可涉。獨雞足百年以來。日以榛翳。山之顯晦如此。然則時節因緣。固有在歟。余家騰衝。與賓川同直雲南之西。而閒關千里。雖無風濤之憂。亦有泥塗之苦。然民國初元。猶得從容解兵。宿山中者旬月。然後去。比居海濱。普陀一水。朝發夕至。而數歲之間。未得一往。故亦不能無感於時節因緣之說。雞足之志。草創於錢邦芑。修飾於范成勳。自茲以後。遂無繼者。余與趙介庵師。常因遊覽。別爲小志。補其闕略。屬稿初定。訖未刊行。普陀山志。自清康熙迄道光。凡三

修焉。今相距僅百年。開如了餘兩師。獨發弘願。延邑儒王雅三學博。從事纂修。書成。寄京師屬余爲序。余於此山。無一日之勤。又罕聞法要。誠不足以敘茲志。而因緣遭值。重違兩師付囑之意。得援法界之旨。稍解世俗之評。并爲雞足發凡。挂名簡牘。亦不可謂非幸也。

中華民國十二年冬勳三位一等文虎章一等大綬嘉禾章雲威將軍上將銜陸軍中將農商總長騰衝李根源謹序

序二

此序專說撰本迹頌之緣起。

吾人一念心性不變。隨緣隨緣不變。隨迷染緣。則背覺合塵。輪迴六道。極之則永墮阿鼻地獄。而心性無減。隨悟淨緣。則返妄歸真。趣證三乘。極之則圓成無上覺道。而心性無增。然在凡夫地。若得聞佛名號。及甚深經義。斯時菩提法潤。已納八識田中。其始雖漠然不自覺知。果能不自暴棄。極力擴充。繼則由涓滴而濫觴。漸至泛舟。以及滔天。終必直趨薩婆若海。圓滿菩提。歸無所得。徹證卽心本具常住不變之妙真。

如性。從茲又復由本垂迹。帶果行因。俾得燈燈相傳。明明無盡。豈不偉然大丈夫哉。法華經云。諸佛兩足尊。知法常無性。佛種從緣起。是故說一乘。緣之時義大矣哉。予自弱冠。卽讀佛經。彼時但欲剽竊文義。作詞料用。於民國二年。始歸心淨土。以期出此火宅。入彼珍池。固知觀音大士。爲蓮邦導首。而復現身塵刹。隨機利生。又與娑婆因緣最深。其應化之迹。在浙江普陀。於是遂動朝禮之念。然尙未有行期也。後於報讀印老法師文數篇。提倡念佛。勸勵敬心。不覺深洽予懷。而正中吾病也。病在全不知敬今自發露。乃一心願見。於十一年促裝就道。造山拜謁。以禮觀音疏呈師。深蒙許可。且不待請求。而以心仰之文鈔持贈。儼非夙緣所追。何至契合如是耶。隔日下山。師更以大士頌相委。予亦自忘固陋。瞽然應承。夫山志加修大士頌一篇。師蓋懷之數年矣。以度生心切。問道者多。未遑秉筆。而吾邑佛學同人。數年前曾囑頌普門感應。予畏用心。託故謝之。乃今竟承師付囑。終以文章報答大士。而慰同人之望。其因緣又寧可思議耶。初輯經文。暨感應事迹。歎其浩如煙海。不知從何處下筆。數得師訓。

曰期徧界流通。同沐慈化。曰令法界衆生。同種善根。同生西方而後已。曰令閱者由歡喜而得生善。破惡入理之益。不覺恍然悟吾師之語。卽大士之心。夫大士功德普賢菩薩不能測其一毛。何能頌窮鄉僻壤愚夫愚婦莫不耳大士名。奉爲慈母。何庸頌此之頌者。不過借大士本迹以訓世化俗耳。頌首契經。次感應。先本後迹也。經中修證本中之本。應化本中之迹也。感應中示現類由本垂迹。救苦與樂迹中之權。弘法攝生迹中之實也。結後十心勸進行者。由迹返本也。復次感應類首示現者。我輩背覺合塵。以心性爲耳目之奴隸久矣。凡見聞所不及者。每視爲子虛烏有。不信法身常住。有佛菩薩。亦不信法身流轉。有因果報應。死後斷滅之見。其禍不可勝言。故以大士示現警之。欲人毋辜佛恩。毋負己靈也。次救苦與樂者。我輩歷劫迷妄。縱知心爲主人。身如傳舍。而我見必不能頓空。然向外馳求業復造業。如抱薪救火。只益自焚。一念回光。將心轉業。形端影直。所謂自求多福也。次弘法者。三界無安。猶如火宅。犧牲文繡。庸足自豪。以佛法而祈福報。明珠彈雀。智者惜焉。故退世閒法。進出世

原书缺页

原书缺页

同異之可論哉。又大士於大悲經。令誦呪者。至心稱念我之名字。亦應專念我本師阿彌陀如來。然後誦呪。又於佛前。自說誓言。誦持大悲神呪。若不生諸佛國者。我誓不成正覺。是正勢至所謂憶佛念佛。現前當來必定見佛者也。須知大士應化。始終皆以念佛而爲宗本。普門一品。佛令一切凡聖念觀世音者。究與念佛有何殊異。浙東普陀山。爲大士應化道場。卽當年爲善財說法處也。印光法師。卓錫是山三十餘年。以普陀舊志。皆於大士本迹感應。未曾發揮。誠所謂舍本逐末。買櫝還珠。甚可痛惜。擬將大藏大士本迹。及此方感應。撰爲頌詞。并一一注其義意。又輯諸經大士本迹諸事。以爲證據。庶可令一切有情。同知大士歷劫深恩。而悉皆常念恭敬。各滿所願矣。以力不暇及。乃託摯友許止淨居士撰之。幸已脫稿。擬欲排印數萬。徧布中外。爰誌所以。用告閱者。民國十三年甲子仲夏。上海黃慶瀾序於會稽道署。

序四

此序雖爲流通單行本頌文而作。實於修志撰頌各緣起言之甚詳。

世出世間一切諸法。皆由時節因緣而爲發起。故古德云。時節若至。其理自彰。誠然。

誠然。光以庸劣。百無一能。寄食普陀山法雨寺三十二年。昔閱普陀志。見其所載。皆屬道場廢興。以及種種尋常等事。至於觀音大士往劫本迹事理。以及此方感應因緣。悉皆闕略。不禁令人長歎。民國六年。王采臣。周孝懷。陳錫周。三居士來山見訪。王周謂普陀爲觀音大士聖道場地。中外景仰。何可久撤講筵。忍令法道寂寞乎。祈師發心講經。我等當爲籌備道糧。光以固陋力辭。錫周則曰。山志久未修。板已模糊。師若肯修。我當刊刻。光曰。此事頗不容易。若照舊例。則文人皆能爲之。若將大士往劫本迹修證。及此方感應事迹。一一略敘大端。令閱者咸知大士恩周沙界。慈濟無疆。從茲發起正信。身心歸依。近獲人天之福。遠證菩提之果者。非徧閱大藏。備考羣籍。不可。若不發揮大士本迹感應諸事理。則成遺主志。賓捨本逐末。與尋常山經水志何異。何以顯普陀爲大士應化道場。又何以顯大士爲法界衆生之大慈悲父母。而與娑婆衆生因緣最深也。然光以宿業。致令心無知識。目等盲瞽。尙須懺悔一二年。待其業消智朗。障盡目明時。當不惜身命。勉令成就。如其業重。不能感格。當往江西。

求黎端甫居士代爲了此公案。此公學貫儒釋。筆超儕伍。必能發揮大士之慈悲心迹也。次年徐蔚如居士以文鈔印行。致不加詳察者。謬謂之爲知識。從茲信札來往。日不暇給。八年春間。端甫歸西。先所發心。竟成空談。十一年春。定海知事陶在東公來山。謂山志流通。令人由信向而改惡遷善。返妄歸真。實爲挽回世道人心之根本要務。急宜重修。光以陶公護法心切。救世情殷。卽令普濟法雨兩寺主人。懇請陶公親任其事。陶公以公事無暇。乃託邑紳王雅三君任之。一切事宜。外有陶公。山有開如退居。商酌料理。光以無暇。絕不過問。次年陶公升於杭縣。猶復魚雁往還。商酌其事。若非宿受大士付囑。其能如是也耶。初於修志議成之後。未及一月。江西彭澤許止淨居士來訪。一見卽成莫逆。光敘昔衷曲。遂以大士頌見託。彼卽允許。若非大士冥垂加被。何有如此之際遇乎。許君乃備搜藏典。及諸羣籍。時經二載。稿方告竣。述成頌文。近二萬言。而復逐聯注其義意。俾閱者悉知所以。又節錄各經以爲明證。頌文三卷。經證一卷。共三百七十餘頁。於夏初寄來。頌中義意。許序已陳。茲不復贅。光

昔本欲冠於山志之首。今以卷帙繁多。特爲別行。兼欲徧布天下。後世儻與志合。行則不易。廣播矣。

後以陶公見頌文超妙。謂須冠於志首。乃刪其注語。及經證等。僅錄正文。統作一卷。名本迹門。爲卷一。

然大士從無量

劫來。分身塵刹。其本迹感應。非佛莫知。此數卷頌。不過大地一塵。大海一滴。令不知大士之深慈大悲者。略知梗概。從茲赧然愧怍。勃然奮發。曰。吾人之心。與大士之心。無二無別。而大士圓成佛道。久經長劫。又以悲心無盡。不離寂光。垂形九界。普現色身。度脫衆生。我輩從無量劫來。輪迴六道。其親蒙拔苦與樂之恩者。不知凡幾。直至今日。尚爲凡夫。上負大士拯拔深恩。下負自己本具佛性。靜言思之。能不愧死。彼既丈夫。我亦爾。不應自輕而退屈。由是翻轉凡情。追隨聖迹。克己復禮。閑邪存誠。敦行世善。兼修淨業。久而久之。與之俱化。上焉者。卽於現生斷惑證真。了生脫死。下焉者。迨至臨終。仗佛慈力。往生西方。能如是。則人人敦禮義。各各識因果。自然干戈息。而人禍永滅。雨暘時。而天眷常臨矣。陶公所謂挽回世道。人心之根本要務者。其在斯乎。所願見者聞者。同發景仰大士之心。而勉力修習。則幸甚幸甚。民國十三年甲子

中秋日古莘印光釋聖量謹撰

石印普陀山志序 附錄

觀世音菩薩於無量劫前久成佛道。號正法明。但以度生念切。救苦心殷。不離寂光。垂形六道。徧於十方微塵佛國。普現色身。度脫衆生。非獨止現菩薩之身。而二乘六道無身不現。法華所謂應以何身得度者。卽現何身而爲說法。雖則徧入十方佛國。而於娑婆因緣甚深甚深。雖則普現十法界身。而世人據迹而論。止云菩薩而已。以其徹證唯心。圓彰自性。故得悲運同體。慈起無緣。由本高而體大。故迹廣而用宏。其隨類逐形。尋聲救苦。有感卽應。無願不從之迹。喻如月麗中天。影現衆水。不但江湖河海各現全月。卽小而一勺一滴。無不各各皆現全月。又江湖河海中月。一人觀之。則其月與已相對。卽百千萬人於百千萬處觀之。亦皆各各與已相對。人若東行。月則隨之而東。人若西行。月則隨之而西。人若安住不動。月則不離當處。一人乃至百千萬人。悉皆如是。菩薩於一念中。徧法界感。徧法界應。感應道交。無少差殊。與此一

月普現衆水。隨人隨地各見全月。了無有異。良由菩薩心包太虛。量周沙界。以衆生之心爲心。以衆生之境爲境。故得不謀而合。無緣而應。豈世智凡情所能測度者哉。至若水昏而目盲。則不能見。非月不現。是昏盲咎其感應之迹。有顯感顯應。冥感冥應。冥感顯應。顯感冥應。亦冥亦顯。感而顯應。亦冥亦顯。感而冥應之不同。顯感顯應者。現生竭誠盡敬。禮念供養。即蒙加被。逢凶化吉。遇難成祥。及業消障盡。福增慧朗等。冥感冥應者。過去生中。曾修竭誠禮念等行。今生雖未修習。由宿善根。得蒙加被。不知不覺。禍滅福臻。業消障盡等。冥感顯應者。宿生曾種善根。今生得蒙加被。顯感冥應者。現生竭誠禮念。不見加被之迹。冥冥之中。承其慈力。凶退吉臨。業消障盡等。亦冥亦顯。感而顯應者。宿世曾種善根。今生竭誠禮念。冥冥之中。承其慈力。獲種種益也。了此則知冥應者。宿世曾種善根。今生竭誠禮念。冥冥之中。承其慈力。獲種種益也。了此則知功不虛棄。果無浪得。縱令畢生不見加被之迹。亦不至心生怨望。半途而廢。感應之道。微妙難思。略書梗概。以助來哲。其應之大小優劣。在其誠之至與未至而已。縱令心不諦信。致誠未極。但能一念投誠。亦必皆蒙利益。但隨己一念之誠。而分優劣。不能如竭誠盡敬者。蒙益之殊勝超絕耳。如昏水中亦有月影。但晦而不顯。盲人雖不能親見月光。又何嘗不蒙其照燭也。菩薩大慈大悲。普爲法界衆生恃怙。由茲舉國人民。各皆信奉。故有家家觀世音之常談。其應化道場。固

非一處。如陝西南五臺山、大香山、浙江天竺山等。其感應昭著，香火肝鬐，唯南海普陀山最爲第一。以其名載華嚴。昔年善財親參，恩周庶類。歷代皇帝敕建，故致舉世欽崇。各國景仰。緬維菩薩應化三乘天仙一類大機，固於此山經劫常住。何止天長地久。至於凡夫所見之迹，乃於五代朱梁貞明二年，慧鏐大師由五臺請銅觀音像，欲歸日本。至此舟膠不動，方始開山。迄今千有餘年，其事迹詩文錄之成帙，名曰普陀山志。余嘗病其於菩薩不思議感應事理，殊欠發揮。擬欲徧閱大藏，博覽羣書，凡屬菩薩隨機赴感之迹，悉備錄之，刊板流通。一以闡菩薩度生之妙道，一以啓衆生出苦之良緣。但以目疾未愈，未能如願。會稽何廉臣居士者，儒得聖心，醫稱國手，志行高潔，信心純真，曾邀同人結桑榆社，以其暮景無多，擬作歸計，同修淨業，企生安養。又以一切衆生久沈苦海，不仗法力，莫由得出，擬將菩薩應化事迹爲救生船，泛於其中，振臂疾呼，俾諸溺者相引登舟，庶可同登彼岸，直達家鄉，永離衆苦，但受諸樂矣。因石印山志以廣其傳，用酬大士度生之恩，用開衆生投誠之路，令余作序。遂

不勝歡喜。頓忘固陋。乃將菩薩感應之妙。略爲發揮。其餘事迹。固有全書在也。何須多贅。民國八年。釋印光撰。

南五臺山觀音菩薩示迹記

并讚○山去陝西省城七十里○附錄

示迹之記。文詞典雅。敘事精詳。惜於菩薩不思議無作妙力。殊欠發揮。光不揣固陋。勉述一讚。以冠於首。俾事理交融。體用咸彰。生之所以能感。聖之所以能應。俱在斯焉。以企後之覽者。發菩提心。見賢思齊。以觀音之心爲心。以觀音之事爲事。庶可亦爲未來世之觀世音耳。雖文不雅馴。而其意義有可取焉。讚曰。

觀音大士。於無量劫。久成佛道。爲度衆生。不離寂光。現菩薩身。又復普應羣機。垂形六道。以三十二應。十四無畏。四不思議。無作妙力。尋聲救苦。度脫羣萌。應以何身得度者。卽現何身。而爲說法。直同月印千江。春育萬卉。雖則了無計慮。而復毫不差殊。良由徹證唯心。圓彰自性。悲運同體。慈起無緣。卽衆生之念。以爲心。盡法界之境。以爲量。是知無盡法界。無量衆生。咸在菩薩寂照心中。故得雲布慈門。波

騰悲海有感卽赴無願不從也。民國三年甲寅釋印光述

以下乃示迹之記

大山巖穴。龍蛇所居。歲久成祇。肆其凶孽。吞齧不已。禍及生民。變怪昇騰。非人所制。若非應身大士。孰能救濟。巍巍乎妙智神力。其容思議。然於不思議境。強以文字紀述。事迹者。冀千載之下。方來君子。啓深信耳。昔隋時仁壽中。此山有毒龍焉。以業通力。變形爲羽人。攜丹藥。貨於長安。詐稱仙術。以欺愚俗。謂此藥之靈。服者立昇於天。嗚呼。無知之民。輕信此語。凡服此藥而昇天者。不知其幾何。又安知墮彼羽人之穴。以充口腹耳。而一方之民。尙迷而不悟。唯我大士。以悲願力。現比丘身。結草爲庵。止於峯頂。以妙智力。伏彼祇通。以清淨風。除其熱惱。慈念所及。毒氣潛消。龍獲清涼。安居巖穴。民被其德。各保其生。昔之怪異。不復見矣。由此靈貺。達於朝廷。以其於國有功。於民有惠。建寺峯頂。而酬酢之。大士以慈風法雨。普濟含靈。慧日淨輝。破諸冥暗。於是搢紳嚮慕。素俗欽風。割愛網以歸真。棄簪纓而入道。大士嘗居磐石。山猿野獸。馴繞座隅。百鳥聚林。寂然而止。如聽法音。久而方散。嗚呼。建寺之明年。六月十九日。